

# Ina reverenza da respect per il poet tujetschin

■ (anr/vi) **ler en damaun ha ina sala plaina fatg reverenza a l'autur Vic Hendry. El po festivar quest onn ses 90avel anniversari. «Blers t'enconuschan sco autur, ma oz lessan nus emprender d'enconuscher il carstgaun Vic Hendry», ha ditg Arnold Spescha a l'entschatta dal discours.**

Hendry è creschì si a Cavorgia en Val Tujetsch en ina famiglia da purs dad indesch uffants. Questa cuntrada e sia famiglia hajan dà ad el in bun suttape dal qual el haja profità sia entira vita. Sco scolast haja el stuì curreger in'entira vita concepts. Uschia haja el survegnì dals scolars inqual impuls per scriver, ha ditg Hendry. El saja era sa rendì ina giada per intginas emnas en praschun per emprender d'enconuscher ils praschuniers. Da questa experientscha è sortì il 1970 il cudesch «Discours cugl assassin».

«La persuladad crescha, ella vegn gronda», è in citat d'ina ovra da Hendry. Spescha ha vulì savair tge che questas lingias hajan da muntar. Ins na sappia betg esser tranter la gliעד ed anc scriver. Per savair sa concentrar sin ils patratgs saja el savens sa retratg en ses pitschen biro, ha declerà Hendry. Ma gist cun questa persuladad – necessaria per scriver – haja el savens era già grondas misergias. Ina metoda per sa consolar saja stada da scriver brevs.

Il discours da Spescha e Hendry è vegnì enramà musicalmain da la violinista *Laura Zangger* che ha interpretà chanzuns popularas rumantschas. Ils raquints da *Vic Hendry* davart sia vita han impressiunà e commuventà il public che ha engrazià il davos al poet tujetschin cun ina reverenza da respect – in chaud applaus en pe.